

**MALAYSIA**  
**DEWAN RAKYAT**  
**ATURAN URUSAN MESYUARAT**

**NASKHAH SAHIH/BAHASA MALAYSIA**

<http://www.parlimen.gov.my>

**HARI RABU, 11 OKTOBER 2023, PUKUL 10.00 PAGI**

**Bil. 51**

---

**PERTANYAAN-PERTANYAAN BAGI JAWAB LISAN**

1. PR-1523-L21770

**Tuan Zahir bin Hassan [ Wangsa Maju ]** minta **MENTERI PENDIDIKAN** menyatakan :

- (a) rancangan kementerian untuk menambah bilangan kolej vokasional yang akan menawarkan kursus kemahiran dalam industri *electric vehicles (EV)* ; dan
- (b) rancangan kementerian untuk menambah kursus-kursus teknikal dan vokasional (TVET) yang lebih relevan seiring dengan perkembangan teknologi semasa seperti kursus berkaitan teknologi pintar dan *artificial intelligence (AI)*.

2. PR-1523-L22250

**Datuk Che Mohamad Zulkifly bin Jusoh [ Besut ]** minta **MENTERI DALAM NEGERI** menyatakan usaha Kerajaan mengatasi masalah kes keganasan yang telah dilakukan oleh "Ah Long" atau pemberi pinjaman wang tanpa lesen memandangkan semakin banyak kes yang menunjukkan Ah Long ini telah merosakkan harta benda orang awam secara sewenang-wenangnya walaupun mereka bukan peminjam kepada Ah Long.

3. PR-1523-L21156

**Tuan Tan Kok Wai [ Cheras ]** minta **MENTERI KESIHATAN** menyatakan kekurangan yang telah dikenalpasti dalam sistem kesihatan negara terutamanya semasa pandemik COVID-19 yang tidak konsisten dengan aspirasi "Kesihatan untuk Semua" dan komitmen kita terhadap Matlamat Pembangunan Lestari (SDGs) Pertubuhan Bangsa-Bangsa Bersatu serta rancangan reformasi sistem penjagaan kesihatan menyeluruh yang akan dilakukan untuk meningkatkan kesejahteraan rakyat Malaysia.

4. PR-1523-L21690  
**Dato' Khilir bin Mohd Nor [ Ketereh ]** minta **MENTERI KEWANGAN** menyatakan apakah Lembaga Pembiayaan Perumahan Sektor Awam (LPPSA) boleh menberhentikan sementara pemotongan gaji sementara menunggu projek perumahan yang tidak siap disambung kembali.
5. PR-1523-L21493  
**Puan Wong Shu Qi [ Kluang ]** minta **MENTERI PEMBANGUNAN WANITA, KELUARGA DAN MASYARAKAT** menyatakan status terkini penubuhan tribunal berkaitan Akta Antigangguan Seksual 2022.
6. PR-1523-L22042  
**Dr. Hajah Halimah Ali [ Kapar ]** minta **MENTERI DALAM NEGERI** menyatakan :
  - (a) tahap kemajuan pembinaan Kompleks IPD Klang Utara yang merangkumi lokap dan kuarters dan berapakah jumlah modal insan yang bakal ditempatkan di sini; dan
  - (b) mekanisme pihak Kerajaan bagi memastikan integriti dan komitmen anggota polis yang menjaga kawasan yang mencabar seperti pihak polis marin menjaga keselamatan persisiran pantai di Selat Klang dan di Pulau Ketam.
7. PR-1523-L21375  
**Dato' Sri Sh Mohmed Puzi bin Sh Ali [ Pekan ]** minta **MENTERI PENGANGKUTAN** menyatakan apakah perancangan Kementerian dalam menintegrasikan pengangkutan awam supaya lebih sistematik dan efisien bukan sahaja di pusat bandar raya, tetapi juga di bandar-bandar kecil dan luar bandar.
8. PR-1523-L21718  
**Datuk Ali anak Biju [ Saratok ]** minta **MENTERI PEMBANGUNAN USAHAWAN DAN KOPERASI** menyatakan langkah-langkah terkini Kementerian untuk memberdayakan usahawan terutama daripada kalangan B40 dan usahawan muda di kawasan luar bandar Sabah dan Sarawak termasuk pelaksanaan Skim Geran Usahawan Orang Asal.
9. PR-1523-L21506  
**Tuan Lee Chean Chung [ Petaling Jaya ]** minta **MENTERI PENDIDIKAN** menyatakan kadar keciciran dari sistem sekolah dan pecahan sebab-sebab keciciran mengikut tahun, umur dan jantina dari tahun 2019 sehingga Jun 2023 bagi setiap negeri dan apakah langkah supaya mereka kembali bersekolah.

10. PR-1523-L22388

**Dato' Seri Dr. Shahidan bin Kasim [ Arau ]** minta **MENTERI KESIHATAN** menyatakan usaha-usaha Kementerian menyelaras (memusatkan) pendaftaran temujanji pesakit bagi memudahkan rakyat terutama golongan orang kurang upaya dan warga emas dalam mendapatkan perkhidmatan kesihatan. Ini berikutan rungutan daripada golongan ini mengenai sistem pendaftaran temu janji di Hospital-hospital Kerajaan yang perlu dibuat secara berasingan dan adalah satu cabaran kepada golongan yang uzur ini kerana jarak di antara klinik-klinik ini adalah sangat jauh.

11. PR-1523-L21582

**Datuk Seri Panglima Madius Tangau [ Tuaran ]** minta **MENTERI DALAM NEGERI** menyatakan apakah langkah-langkah yang telah diambil untuk melaksanakan Laporan Suruhanjaya Siasatan DiRaja Mengenai Pendatang Asing Tanpa Izin di Sabah.

12. PR-1523-L22025

**Tuan Zulkifli bin Ismail [ Jasin ]** minta **MENTERI KESIHATAN** menyatakan usaha Kementerian untuk mengkaji semula penyelarasan gaji jururawat memandangkan kebanyakan jururawat Malaysia lebih suka bekerja di luar negara.

13. PR-1523-L21628

**Puan Rodiyah binti Sapiee [ Batang Sadong ]** minta **MENTERI PEMBANGUNAN WANITA, KELUARGA DAN MASYARAKAT** menyatakan :

- (a) ukuran yang diguna pakai untuk mengukur tahap kemiskinan dalam kalangan kanak-kanak dan berapakah peratusan kanak-kanak ini yang tinggal dalam keluarga isi rumah miskin di Malaysia; dan
- (b) apakah program dan belanjawan khusus untuk mengatasi masalah kemiskinan kanak-kanak.

14. PR-1523-L21905

**Ir. Ts. Haji Khairil Nizam bin Khirudin [ Jerantut ]** minta **MENTERI PENGANGKUTAN** menyatakan adakah pihak Kerajaan mempunyai perancangan agar proses penukaran tiket bas daripada aplikasi pihak ketiga seperti Traveloka, Tiket.com, RedBus, EasyBook kepada *boarding pass* syarikat bas yang dinaiki dapat dilancarkan, agar dapat mengurangkan kesesakan yang berlaku di terminal bas terutamanya waktu-waktu perayaan.

15. PR-1523-L21801

**Tuan Tan Hong Pin [ Bakri ]** minta **MENTERI DALAM NEGERI** menyatakan perkembangan siasatan terhadap kes warganegara Myanmar Thuzar Maung dan ahli keluarganya. Oleh itu, apakah perkembangan usaha penambah baik SOP PDRM dalam kes-kes kehilangan atau penculikan seperti yang disarankan dalam laporan SUHAKAM mengenai kes kehilangan Joshua Hilmy dan Ruth Sitepu.

16. PR-1523-L22414

**Dato' Sri Dr. Haji Ismail bin Haji Abd. Muttalib [ Maran ]** minta **MENTERI KESIHATAN** menyatakan sejauh manakah tindakan Kementerian dalam usaha menyegerakan pembinaan Hospital Maran yang telah diluluskan sejak RMKe-11 lagi dan mengapa masih tiada apa-apa lagi tindakan sehingga kini.

17. PR-1523-L21236

**Tuan Sanisvara Nethaji Rayer A/L Rajaji [ Jelutong ]** minta **MENTERI PENGANGKUTAN** menyatakan adakah Kerajaan bercadang membantu Suruhanjaya Pelabuhan Pulau Pinang untuk memperluaskan perkhidmatan feri baru di sekitar Pulau Pinang supaya dapat membantu mengurangkan kesesakan lalu lintas yang makin teruk di Pulau Pinang dewasa ini.

18. PR-1523-L21757

**Dato' Sri Ikmal Hisham bin Abdul Aziz [ Tanah Merah ]** minta **MENTERI PENDIDIKAN** menyatakan sejauh manakah serius masalah kekurangan guru di sekolah-sekolah negara.

19. PR-1523-L21598

**Tuan Roy Angau anak Gingkoi [ Lubok Antu ]** minta **MENTERI PEMBANGUNAN USAHAWAN DAN KOPERASI** menyatakan usaha dan bantuan yang disediakan bagi menggalakkan penyertaan lebih ramai golongan muda dan wanita di kawasan luar bandar Sabah dan Sarawak yang untuk menceburi bidang keusahawanan dan industri kotej.

20. PR-1523-L22103

**Dato' Seri Hamzah bin Zainudin [ Larut ]** minta **MENTERI KEWANGAN** menyatakan bila dan apakah tindakan yang akan diambil ke atas pihak yang terlibat dalam skandal Skim Insuran Am Selangor (INSAN) berikutan pelanggaran tatakelola di bawah Akta Perkhidmatan Kewangan 2013 kerana mendaftar *consumer* secara haram tanpa pengetahuan dan kebenaran penama.

21. PR-1523-L21482

**Tuan Pang Hok Liong [ Labis ]** minta **MENTERI KEWANGAN** menyatakan KidZania Singapura yang dimiliki oleh Khazanah Nasional Bhd. yang telah dibeli oleh Sim Leisure Group pada harga RM380,000 pada November 2020 telah mengakibatkan Khazanah Nasional Bhd. mengalami kerugian besar sejumlah RM200 juta dan apakah tindakan sewajarnya akan diambil terhadap mereka yang menyebabkan kerugian itu.

22. PR-1523-L22344

**Tuan Jamaludin bin Yahya [ Pasir Salak ]** minta **MENTERI KEWANGAN** menyatakan status terkini pengambilalihan Boustead Naval Shipyard oleh Kementerian Kewangan dan apakah hala tuju atau visi misi dan objektif terhadap pengambilalihan tersebut.

23. PR-1523-L21765

**Tuan Zahir bin Hassan [ Wangsa Maju ]** minta **MENTERI PENDIDIKAN** menyatakan :

- (a) dengan merujuk kenyataan media pada 5 Ogos 2023, apakah rasional dan justifikasi Kementerian dalam mewujudkan sekolah khas bagi golongan miskin ; dan
- (b) sama ada Kementerian telah membuat kajian menyeluruh termasuk kajian terhadap impak sosial dan psikologi sebelum mengumumkan pelaksanaan sekolah khas tersebut.

24. PR-1523-L22152

**Dato' Dr. Ahmad Yunus bin Hairi [ Kuala Langat ]** minta **MENTERI PENDIDIKAN** menyatakan perancangan khusus Kementerian untuk menampung kepadatan pelajar di SK Kebun Baru, SK Jenjarum dan SK Bukit Changgang.

25. PR-1523-L22656

**Datuk Ir. Shahelmey bin Yahya [ Putatan ]** minta **MENTERI KEWANGAN** menyatakan menurut laporan oleh BMI yang berpangkalan di London, inflasi Malaysia adalah pada kadar sederhana, memuncak pada 4.7% *year-over-year* pada Ogos 2022. Data terkini (Mei 2023) meletakkan inflasi pada 2.8% *year-over-year*. Ini adalah bacaan inflasi terendah sejak Mei 2022, walaupun ini lebih tinggi daripada kebiasaan isi rumah Malaysia (purata inflasi 2.0% tahun ke tahun sepanjang tempoh 2015-2019). Pasukan pakar meramalkan inflasi akan menurun pada penghujung 2023 ke 2.5% tahun ke tahun dan purata 2.3% berbanding 2024. Risikonya ialah jikalau inflasi kekal pada tahap ini lebih lama daripada yang dijangkakan, yang akan mempercepatkan penghakisan kuasa beli isi rumah. Nyatakan tindakan yang bakal diambil oleh pihak Kementerian untuk menurunkan lagi kadar inflasi serendah 2%.

26. PR-1523-L21955

**Dato' Sri Saifuddin Abdullah [ Indera Mahkota ]** minta **MENTERI PENDIDIKAN** menyatakan apakah pelan terperinci pihak Kementerian terhadap kesinambungan inisiatif Pelan Pembangunan Pendidikan 2013-2025.

27. PR-1523-L21500

**Puan Wong Shu Qi [ Kluang ]** minta **MENTERI KEWANGAN** menyatakan status Fasiliti Sokongan Akaun 2 (FSA) KWSP dengan menyatakan bilangan peserta mengikut pecahan umur, jantina, kaum, negeri, jumlah pinjaman dan institusi kewangan.

28. PR-1523-L22311

**Dato' Dr. Alias bin Razak [ Kuala Nerus ]** minta **MENTERI KESIHATAN** menyatakan kuota Jururawat Terlatih Warga Asing (JTWA) yang dibenarkan oleh Kementerian dan apakah faktor mendesak yang mendorong kepada keperluan jururawat import ini.

29. PR-1523-L21782

**Tuan Riduan bin Rubin [ Tenom ]** minta **MENTERI PENDIDIKAN** menyatakan apakah perkembangan terkini status menaik taraf bangunan serta infrastruktur sekolah daif terutamanya di Tenom yang telah diumumkan di dalam Belanjawan 2023 menerusi peruntukan berjumlah RM900 juta.

30. PR-1523-L22585

**Datuk Dr. Nik Muhammad Zawawi bin Haji Salleh [ Pasir Puteh ]** minta **MENTERI PENDIDIKAN** menyatakan perancangan pihak Kementerian dalam menambah dan menaik taraf kemudahan infrastruktur sekolah-sekolah di luar bandar agar seimbang dengan perkembangan arus perdana termasuklah capaian internet.

31. PR-1523-L21366

**Dato Henry Sum Agong [ Lawas ]** minta **MENTERI KESIHATAN** menyatakan apakah tahap pelaksanaan klinik daerah Lawas yang tergendala dan Hospital Daerah Lawas yang sedang dalam pelaksanaan, bila boleh disiapkan.

32. PR-1523-L22636

**Komander Nordin bin Ahmad Ismail TLDM (Bersara) [ Lumut ]** minta **MENTERI PENDIDIKAN** menyatakan adakah perancangan pembinaan Sekolah Berasrama Penuh di Daerah Manjung yang jumlah penduduknya hampir 300,000 orang di mana tiada sekolah berasrama di daerah ini.

33. PR-1523-L21169

**Tuan Prabakaran A/L M Parameswaran [ Batu ]** minta **MENTERI PEMBANGUNAN USAHAWAN DAN KOPERASI** menyatakan adakah TEKUN mempunyai program-program keusahawanan yang melibatkan silibus libat urus pentadbiran, promosi dan pemasaran, skil penggunaan komputer seperti *Microsoft Excel*, aplikasi reka grafik dan penulisan pemasaran bagi membantu peminjam untuk meningkatkan jualan mereka dan meningkatkan kebolehpayaan pembayaran semula.

34. PR-1523-L22121

**Puan Hajah Salamiah binti Mohd Nor [ Temerloh ]** minta **MENTERI PENDIDIKAN** menyatakan :

- (a) status pembinaan bangunan tambahan Kolej ERT Puteri Temerloh yang bermula pada 14 Disember 2020, dijangka siap pada 14 Ogos 2022; dan
- (b) bila tarikh pihak sekolah boleh menggunakan bangunan itu sepenuhnya.

35. PR-1523-L21347

**Datuk Seri Panglima Bung Moktar bin Radin [ Kinabatangan ]** minta **MENTERI PENDIDIKAN** menyatakan apakah perancangan Kementerian dalam menaik taraf sekolah-sekolah daif di kawasan Parlimen Kinabatangan bagi memastikan para pelajar dapat belajar dalam keadaan yang selamat, selesa dan kondusif.

36. PR-1523-L21720

**Datuk Ali anak Biju [ Saratok ]** minta **MENTERI KESIHATAN** menyatakan adakah pihak Kementerian berhasrat untuk memperluas klinik kesihatan bergerak di seluruh negara termasuk di kawasan luar bandar dan pedalaman Sabah dan Sarawak, dan berapakah bilangan klinik bergerak yang sedia ada sehingga kini.

37. PR-1523-L21385

**Datuk Seri Ir. Dr. Wee Ka Siong [ Ayer Hitam ]** minta **MENTERI PENDIDIKAN** menyatakan inisiatif dan pendekatan yang akan dilaksanakan oleh Kementerian berikutan kegagalan 90,000 calon Sijil Pelajaran Malaysia (SPM) 2022 dalam subjek Matematik manakala 52,000 calon lagi tidak lulus dalam subjek Bahasa Inggeris.

38. PR-1523-L22355

**Tuan Ahmad Tarmizi bin Sulaiman [ Sik ]** minta **MENTERI PEMBANGUNAN USAHAWAN DAN KOPERASI** menyatakan pelan tindakan Kementerian bagi membangunkan usahawan yang menggunakan kemudahan digital bagi meningkatkan pemasaran produk tempatan yang dihasilkan.

39. PR-1523-L21605

**Dato' Sri Ismail Sabri bin Yaakob [ Bera ]** minta **MENTERI KEWANGAN** menyatakan :

- (a) usaha Kerajaan untuk menambah hasil pendapatan negara; dan
- (b) adakah cukai seperti Cukai Barang dan Perkhidmatan (GST) akan diperkenalkan semula dengan kadar percukaian yang lebih rendah atau terdapat pengecualian terhadap barang-barang tertentu.

40. PR-1523-L21772

**Tuan Syed Saddiq bin Syed Abdul Rahman [ Muar ]** minta **MENTERI KEWANGAN** menyatakan apakah langkah yang akan diambil oleh Kementerian bagi menampung kenaikan jumlah subsidi berikutan jangkaan kenaikan harga minyak dunia dan anggaran subsidi sehingga RM17 bilion berdasarkan kadar penggunaan minyak tahunan sebanyak RM14.4 bilion.



41. PR-1523-L21396

**Tuan Chow Kon Yeow [ Batu Kawan ]** minta **MENTERI PEMBANGUNAN WANITA, KELUARGA DAN MASYARAKAT** menyatakan adakah kerajaan akan mengkaji semula syarat-syarat teknikal demi memudah cara pendaftaran taska di rumah. Apakah langkah yang akan diambil untuk memastikan penyelarasan daripada segi pendaftaran dan juga penguatkuasaan melibatkan penjagaan golongan kanak-kanak berusia empat hingga sembilan tahun supaya terdapat kesinambungan pada aspek ko-kurikulum serta dasar-dasar termasuk perbezaan dua bidang kuasa di antara pihak Kementerian.

42. PR-1523-L21947

**Datuk Iskandar Dzulkarnain bin Abdul Khalid [ Kuala Kangsar ]** minta **MENTERI KESIHATAN** menyatakan kajian kebolehlaksanaan dan garis panduan yang telah dibangunkan oleh Kementerian bagi mengelakkan risiko kes keracunan akibat penjualan ubat tanpa kawalan susulan cadangan mewujudkan kios mesin layan diri perubatan di Projek Perumahan Rakyat (PPR).

43. PR-1523-L21797

**Tuan Chow Yu Hui [ Raub ]** minta **MENTERI DALAM NEGERI** menyatakan kadar *recidivism* bagi banduan akhir yang telah diberikan pengampunan ataupun dibebaskan serta bagi banduan yang telah habis hukum penjara atas kesalahan berkaitan dengan dadah.

44. PR-1523-L22252

**Tan Sri Haji Abdul Hadi bin Awang [ Marang ]** minta **MENTERI DALAM NEGERI** menyatakan apakah garis panduan Kerajaan dalam bertindak terhadap larangan bersuara isu 3R (raja, agama dan kaum).

45. PR-1523-L21932

**Dato' Ramanan Ramakrishnan [ Sungai Buloh ]** minta **MENTERI PENGANGKUTAN** menyatakan apakah perancangan jangka masa panjang *first mile and last mile* yang optimum, berkesan dan cekap untuk para pengguna pengangkutan awam seperti LRT, KTM Komuter, dan MRT.

46. PR-1523-L21580

**Datuk Seri Panglima Madius Tangau [ Tuaran ]** minta **MENTERI DALAM NEGERI** menyatakan berapa kematian di setiap negeri dan wilayah di seluruh negara dan khusus untuk daerah Tuaran dalam tempoh Januari hingga September 2023.

47. PR-1523-L21892

**Tuan Jimmy Puah Wee Tse [ Tebrau ]** minta **MENTERI PEMBANGUNAN WANITA, KELUARGA DAN MASYARAKAT** menyatakan usaha mengurangkan karenah birokrasi di Jabatan Kebajikan Masyarakat (JKM) ketika mendaftarkan OKU dan golongan miskin untuk memohon bantuan daripada Kementerian dan apakah langkah terkini bagi mempercepatkan proses permohonan.

48. PR-1523-L21519

**Tuan Haji Ahmad Johnie bin Zawawi [ Igan ]** minta **MENTERI DALAM NEGERI** menyatakan status terkini pembinaan baharu Ibu Pejabat Polis (IPD) Matu-Daro yang baharu dan bilakah projek ini akan dilaksanakan.

49. PR-1523-L21578

**Puan Vivian Wong Shir Yee [ Sandakan ]** minta **MENTERI PENDIDIKAN** menyatakan secara terperinci:

- (a) jumlah guru-guru berkhidmat di sekolah rendah (SK, SJKC), sekolah menengah (SMK) serta sekolah tingkatan enam dan jumlah kekosongan guru-guru di Parlimen Sandakan; dan
- (b) jumlah murid-murid yang didaftarkan di bawah pendidikan khas dan integrasi di Parlimen Sandakan serta jumlah kelas yang disediakan untuk menampung murid-murid bekeperluan khas ini.

50. PR-1523-L21813

**Dato' Verdon bin Bahanda [ Kudat ]** minta **MENTERI PENGANGKUTAN** menyatakan rancangan Kerajaan untuk kawalan harga tiket atau insentif penerbangan udara khusus untuk pelajar Sabah dan Sarawak yang menuntut pengajian di Semenanjung Malaysia dan pelajar Semenanjung Malaysia yang menuntut pengajian di Sabah dan Sarawak.

51. PR-1523-L21755

**Datuk Seri Panglima Haji Mohd Shafie bin Haji Apdal [ Semporna ]** minta **MENTERI PENGANGKUTAN** menyatakan perancangan segera Kementerian bagi menaik taraf kemudahan di Lapangan Terbang Antarabangsa Kota Kinabalu (KKIA), Lapangan Terbang Tawau dan Lapangan Terbang Sandakan memandangkan ketibaan pelancong antarabangsa dan domestik yang semakin tinggi di Sabah.

52. PR-1523-L21387

**Tuan Chow Kon Yeow [ Batu Kawan ]** minta **MENTERI PENGANGKUTAN** menyatakan apakah modal/sumber kewangan bagi pelaksanaan projek pembesaran Lapangan Terbang Antarabangsa Pulau Pinang (PIA) yang telah diumumkan sebelum ini. Perincian tempoh masa pelaksanaannya termasuk penyelesaian mitigasi banjir di kawasan berkaitan.

53. PR-1523-L21854

**Puan Rodziah binti Ismail [ Ampang ]** minta **MENTERI PENDIDIKAN** menyatakan strategi untuk memastikan Dasar Pendidikan Digital Negara mengambil kira kemampuan para pelajar menggunakan teknologi digital untuk pembelajaran serta memanfaatkan inovasi dan transformasi digital di sekolah, rumah atau di mana sahaja di samping menyediakan setiap seorang satu peranti bersesuaian.

54. PR-1523-L21776

**Tuan Riduan bin Rubin [ Tenom ]** minta **MENTERI PENGANGKUTAN** menyatakan usaha pihak Kerajaan untuk meningkatkan prestasi penglibatan Bumiputera Sabah di dalam sektor logistik bermargin tinggi bagi merebut peluang ekonominya yang semakin berkembang kesan daripada pembangunan infrastruktur jaringan perhubungan oleh Kerajaan di Sabah.

55. PR-1523-L21824

**Tuan Mordi Bimol [ Mas Gading ]** minta **MENTERI KESIHATAN** menyatakan jumlah aduan berkenaan kesan sampingan vaksinasi COVID-19 yang dilaporkan mengikut jenis vaksin dan apakah terdapat kaitan kesan sampingan vaksinasi COVID-19 yang menyumbang kepada penyakit kanser.

**ATURAN URUSAN MESYUARAT DAN USUL-USUL**

1. ( D.R. 28/2023 ) Pertimbangan ke atas Rang Undang-Undang Kecekapan dan Konservasi Tenaga 2023 **Dalam Jawatankuasa Sebuah-buah Majlis ( 10 Oktober 2023 )**  
  
**[ Kementerian Sumber Asli, Alam Sekitar dan Perubahan Iklim ]**
  
2. ( D.R. 29/2023 ) Rang Undang-Undang Bekalan Elektrik (Pindaan) 2023. **Bacaan Kali Yang Kedua**  
  
**[ Kementerian Sumber Asli, Alam Sekitar dan Perubahan Iklim ]**
  
3. **Menteri di Jabatan Perdana Menteri** akan mencadangkan :  
  
“Bahawa mengikut Peraturan Mesyuarat 86(5), maka Penyata Jawatankuasa Peraturan-peraturan Mesyuarat yang dibentangkan di atas meja mesyuarat di dalam Dewan ini sebagai Kertas DR. 9 Tahun 2023 hendaklah diterima dan dipersetujukan.”
  
4. ( D.R. 34/2023 ) Rang Undang-Undang Kewangan Awam dan Tanggungjawab Fiskal 2023. **Bacaan Kali Yang Kedua**  
  
**[ Menteri Kewangan ]**
  
5. ( D.R. 32/2023 ) Rang Undang-Undang Lembaga Hasil Dalam Negeri Malaysia (Pindaan) 2023. “  
  
**[ Menteri Kewangan ]**
  
6. ( D.R. 27/2023 ) Rang Undang-Undang Suruhanjaya Perkhidmatan Air Negara (Pindaan) 2023. “  
  
**[ Kementerian Sumber Asli, Alam Sekitar dan Perubahan Iklim ]**
  
7. ( D.R. 33/2023 ) Rang Undang-Undang Syarikat (Pindaan) 2023. “  
  
**[ Menteri Perdagangan Dalam Negeri dan Kos Sara Hidup ]**

8. ( D.R. 25/2023 ) Rang Undang-Undang Kawalan Produk Merokok Demi Kesihatan Awam 2023 – **Bacaan Kali Yang Kedua**

Dan;

Pengerusi Jawatankuasa Pilihan Khas Kesihatan oleh Yang Berhormat Datuk Seri Dr. Dzulkefly bin Ahmad, Ahli Parlimen Kuala Selangor akan mencadangkan :

**“BAHAWA** Penyata yang disediakan oleh Jawatankuasa Pilihan Khas Kesihatan untuk mengkaji Rang Undang-Undang Kawalan Produk Merokok Demi Kesihatan Awam 2023, yang dibentangkan dalam Majlis ini sebagai Kertas DR. 8 Tahun 2023 diperkenankan mengikut Peraturan Mesyuarat 60”.

9. ( D.R. 26/2023 ) Rang Undang-Undang Makanan (Pindaan) 2023. **Bacaan Kali Yang Kedua**  
**[ Menteri Kesihatan ]**

10. PR-1523-U(27)278  
**Datuk Seri Ir. Dr. Wee Ka Siong [ Ayer Hitam ]** akan mencadangkan :

"Bahawa Dewan Rakyat ini menggesa Kerajaan untuk segera menangani isu gangguan bekalan beras putih tempatan (BPT) di pasaran yang kian meruncing susulan tindakan India menghentikan eksport beras putihnya ke pasaran.

Langkah penetapan had pembelian maksimum 100kg BPT untuk setiap individu dan syarikat bermula 7 September 2023 hanyalah penyelesaian yang bersifat sementara dan Kerajaan seharusnya mula merangka satu pelan yang lebih tuntas dalam usaha menjamin keterjaminan bekalan beras di Malaysia bagi jangka masa yang panjang.

Kerajaan perlu segera mewujudkan rangka tindakan yang lebih komprehensif bagi mengurangkan impak inflasi makanan global dari terus menghimpit rakyat negara ini khususnya berkaitan beras yang menjadi makanan ruji kita semua."

**[ Menteri Pertanian dan Keterjaminan Makanan ]**

## 11. PR-1523-U(27)279

**Datuk Seri Ir. Dr. Wee Ka Siong [ Ayer Hitam ]** akan mencadangkan :

"Bahawa Dewan Rakyat ini menggesa Kerajaan mencari penyelesaian untuk mengurangkan kos pengambilan pekerja asing yang kian melambung tinggi. Kebergantungan majikan tempatan terhadap pekerja asing berbanding pekerja tempatan di negara ini bukanlah perkara asing terutama dalam sektor 3D (*dirty, dangerous and difficult*).

Maka, adalah penting untuk mewujudkan satu dasar yang lebih komprehensif bagi mengurangkan kebergantungan terhadap pekerja asing agar pekerja tempatan diberi keutamaan terlebih dahulu dengan reformasi terhadap ekosistem sektor 3D meliputi kadar gaji, faedah dan sebagainya yang berpadanan dengan risiko pekerjaan perlu diimplementasikan secara berseiringan."

**[ Menteri Dalam Negeri ]**

## 12. PR-1523-U(27)280

**Datuk Seri Ir. Dr. Wee Ka Siong [ Ayer Hitam ]** akan mencadangkan :

"Bahawa Dewan Rakyat ini menggesa Kerajaan untuk mewujudkan satu dasar mengutamakan sajian menu buah-buahan tempatan di semua majlis rasmi Kerajaan sebagai galakan dan sokongan kepada pemain industri buah-buahan tempatan serta ke arah membudayakan amalan pemakanan sihat.

Adalah menjadi tanggungjawab Kementerian bagi membantu pengusaha buah-buahan tempatan untuk memasarkan serta mempromosi hasil ladang mereka dan sekali gus meningkatkan pendapatan. Maka melalui sajian menu buah-buahan di kesemua majlis rasmi Kerajaan perlu dibudayakan sepenuhnya sebagai sokongan terhadap industri buah-buahan tempatan.

**[ Menteri Pertanian dan Keterjaminan Makanan ]**

## 13. PR-1523-U(27)281

**Dato' Indera Mohd Shahar bin Abdullah [ Paya Besar ]** akan mencadangkan :

"Bahawa Dewan Rakyat menggesa Kerajaan untuk membentangkan perancangan jangka masa panjang yang menyeluruh dalam memastikan Jumlah Kadar Kesuburan (Total Fertility Rate) bagi rakyat Malaysia terus meningkat.

Negara kita telah beralih ke status negara menua pada tahun 2021. Hal ini kerana peratusan penduduk berusia 65 tahun dan ke atas telah mencapai 7% daripada jumlah populasi. Trend ini menunjukkan peningkatan dalam dua tahun lalu pada kadar 0.2 peratus setahun di mana pada tahun 2022 sebanyak 7.2% dan dijangka pada tahun 2023 mencapai 7.4%.

Dalam tempoh dua dekad lagi, negara dijangka beralih kepada negara tua apabila kohort umur yang sama mencapai 14% daripada jumlah populasi. Peralihan ini tentunya memberikan kesan yang paling ketara iaitu kepada penurunan trend populasi pekerja dan produktiviti. Bagi menghadapi cabaran dan dampak negara menua, kita perlu mencari jalan memperlahankan proses penuaan ini. Proses penuaan ini tidak boleh dihalang atau diberhentikan tetapi kita perlu mempunyai pelan persediaan bagi menghadapi situasi tersebut.

Jika kita teliti jumlah peratusan struktur umur penduduk yang berumur 0-14 tahun berlaku penurunan pada kadar 0.4% bagi 3 tahun iaitu ; tahun 2020 sebanyak 24%, 2021 sebanyak 23.6%, 2022 sebanyak 23.2%, dan 2023 sebanyak 22.6%.

Umum mengetahui negara-negara jiran dan serantau juga menghadapi perkara penurunan bagi jumlah kadar kesuburan, tetapi kadar tersebut agak perlahan penurunannya. Sehubungan itu, objektif kita agar dapat melandaikan graf penurunan ini bagi negara kita.

Persoalan saya, apakah kemampuan hospital Kerajaan dalam meningkatkan kemampuan kesihatan reproduktif. Berapa jumlah Hospital yang menyediakan perkhidmatan IUI dan IVF. Berapa ramai doktor pakar reproduktif masih berkhidmat di hospital Kerajaan. Adakah harga perkhidmatan yang dikenakan mampu diakses oleh rakyat. Berapa jumlah makmal reproduktif.

Dewan Rakyat juga perlu mencadangkan agar Kerajaan menetapkan polisi yang mampan seperti fleksibel waktu bekerja, yuran pusat penjagaan kanak yang mampu bayar, perbanyakkan pusat asuhan ditempat kerja, dan *paternity leave* kepada ibu bapa yang bekerja untuk meringankan bebanan mereka dalam meningkatkan kadar reproduktif rakyat Malaysia. *Population Complexity* ini yang harus kita uruskan dengan penuh keberanian dan semua pihak kena bersama-sama."

**[ Menteri Pembangunan Wanita, Keluarga dan Masyarakat ]**

14. PR-1523-U(27)283

**Dato' Indera Mohd Shahar bin Abdullah [ Paya Besar ]** akan mencadangkan :

"Bahawa Dewan Rakyat menggesa Kerajaan untuk membentangkan sebuah Kertas Putih Imigresen yang membincangkan tentang kadar atau jumlah sebenar kemasukan pelawat asing ke negara Malaysia.

Perkara ini bertujuan untuk mengetahui pergerakan pelawat asing berkenaan sama ada mereka terus tinggal di Malaysia atau dalam satu tempoh tertentu. Menerusi ini kita akan mengetahui jumlah sebenar populasi rakyat di negara ini melalui pengenalan perbezaan antara jumlah Warganegara Malaysia, Jumlah Pelawat Asing yang masuk ke negara kita sebagai pekerja ataupun dengan tujuan melancong.

Hal ini, akan memudahkan Kerajaan untuk merangka dan melaksanakan pelbagai pelan inisiatif mahupun bantuan seperti subsidi bersasar dan lain-lain agar setiap pelaksanaan tersebut dinikmati oleh rakyat di negara kita."

**[ Menteri Dalam Negeri ]**

15. PR-1523-U(27)286

**Datuk Seri Panglima Madius Tangau [ Tuaran ]** akan mencadangkan :

"Bahawa Dewan ini menerima hakikat bahawa lebih 100,000 calon peperiksaan SPM pada tahun 2022 telah gagal dalam mata pelajaran dan sekaligus gagal mendapat Sijil Pelajaran Malaysia (SPM).

Menerima hakikat juga bahawa kegagalan dalam peperiksaan SPM ini mengakibatkan masa depan yang gelap kepada calon pada purata 70 ribu hingga 100 ribu setahun.

Menerima hakikat bahawa pelajar tercicir ini tidak ada lagi ruang untuk melanjutkan pelajaran maka segolongan pelajar tercicir ini akan menjadi kerugian dalam sumber tenaga kerja negara.

Dan menerima hakikat bahawa matlamat mendidik sebuah generasi pelajar untuk membina dan membangun negara kita telah gagal maka Kerajaan hendaklah mengambil tindakan yang serius terhadap masalah ini.



Maka dengan itu Dewan Yang Mulia ini hendaklah membuat ketetapan agar silibus dan buku-buku teks Subjek Sejarah Tingkatan Satu, Dua, Tiga, Empat dan Tingkatan Lima hendaklah dikaji semula dan sebuah Jawatankuasa Pilihan Khas Parlimen hendaklah ditubuhkan untuk mendapat pandangan daripada setiap lapisan masyarakat daripada seluruh pelusuk negara, dan pada masa yang sama Jemaah Kabinet hendaklah menubuhkan sebuah Jawatankuasa Kabinet Kajian Semula Silibus dan Buku Teks Sejarah yang dianggotai oleh Menteri-Menteri yang mewakili Sabah, Sarawak, Persekutuan Tanah Melayu dan parti-parti politik yang menubuhkan Kerajaan Perpaduan."

**[ Menteri Pendidikan ]**

16. PR-1523-U(27)287

**Datuk Seri Panglima Madius Tangau [ Tuan ]** akan mencadangkan :

"Bahawa Dewan ini Menerima hakikat bahawa sebuah Suruhanjaya Siasatan DiRaja yang ditubuhkan oleh Kerajaan suatu ketika dahulu telah berjaya membuat siasatan dan seterusnya telah dibentangkan di Dewan Yang Mulia ini.

Dan menerima hakikat bahawa setelah sekian lama laporan tersebut telah gagal dilaksanakan dan mengakibatkan ketidakpuasan hati sebahagian besar daripada rakyat Malaysia.

Menerima hakikat juga bahawa rakyat tertanya-tanya apakah yang telah terjadi dengan laporan Suruhanjaya Siasatan DiRaja tersebut.

Dan menerima hakikat bahawa kecelaruan urus tadbir Pendatang Tanpa Izin; Penduduk Asing di Sabah yang mempunyai Kad Pengenalan yang meragukan; Peningkatan Bilangan penduduk di Sabah Tanpa Kewarganegaraan ataupun *stateless children* dan kehadiran orang asing yang memegang dokumen IMM13 yang tidak ada halatuju.

Maka Dewan Yang Mulia ini hendaklah membuat ketetapan bahawa sebuah Jawatankuasa Pilihan Khas Parlimen untuk meneliti dan mengkaji semula rekomendasi dan perakuan Laporan Suruhanjaya Siasatan DiRaja Mengenai Pendatang Asing Tanpa Izin untuk merumuskan suatu Road Map penyelesaian tuntas terhadap masalah oleh empat kategori penduduk golongan pendatang asing di Sabah."

**[ Menteri Dalam Negeri ]**

## 17. PR-1523-U(27)290

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa supaya Kerajaan meletakkan sebuah garis panduan untuk sekolah-sekolah bagi pengurusan dana, perbelanjaan, dan juga aktiviti kutipan wang daripada pelajar, ibu-bapa, dan orang ramai. Selain itu, sebuah badan pemantau perlu diwujudkan bagi memastikan garis panduan ini dipatuhi. Ini kerana, kini sudah menjadi sebuah kelaziman untuk pihak-pihak sekolah menganjurkan program-program dan majlis-majlis yang memakan belanja besar, yang menggunakan duit daripada poket pelajar. Sebahagian daripada majlis ini mewajibkan kehadiran, dan sebahagian lainnya adalah secara sukarela. Tetapi harus kita faham, kewujudan jurang ekonomi akan membuatkan wujudnya golongan pelajar yang rasa keciciran sosial disebabkan faktor kewangan keluarga. Ia juga membuat mereka berasa tertekan serta memberi tekanan kepada ibu-bapa, lebih-lebih lagi dalam situasi ekonomi kini. Bukan sahaja untuk majlis, malah sering juga pihak sekolah membuat kutipan wajib bagi pembaharuan infrastruktur, dan kutipan ini kadangkala boleh mencecah ratusan ringgit. Isu ini merupakan sebuah isu yang kurang mendapat perhatian tetapi penting untuk dibawa ke hadapan kerana ia melibatkan sosioekonomi keluarga B40 dan M40 serta kesejahteraan perkembangan minda dan emosi para pelajar yang bakal menjadi teraju negara ini di masa hadapan. Selain itu, dibimbangi jika tiada pemantauan dilakukan, perkara ini akan membuka ruang untuk pihak tertentu mengambil kesempatan."

**[ Menteri Pendidikan ]**

## 18. PR-1523-U(27)291

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa supaya Kerajaan mengambil langkah pro-aktif dalam menangani serta menghentikan kes jenayah dera kanak-kanak di negara ini. Menteri Dalam Negeri pada 14 Mac 2023 melaporkan bahawa terdapat 220 kes kanak-kanak mati akibat penderaan antara tahun 2018 hingga 2022. Data Kementerian Pembangunan Wanita, Keluarga dan Masyarakat antara Januari hingga Jun 2022 juga mendedahkan terdapat 1,055 kes penderaan kanak-kanak di negara ini. Kanak-kanak adalah masa depan negara. Lantaran itu, pihak kerajaan wajar menangani lantas menghentikan kitaran dera ini dengan sebuah target 'Dera Sifar' menerusi langkah-langkah pro-aktif seperti mewajibkan kursus penjagaan anak, mewujudkan sistem pemantauan berkala, meneliti semula undang-undang serta garis panduan berkenaan penjagaan kanak-kanak, meningkatkan kesedaran masyarakat, dan lain-lain."

**[ Menteri Dalam Negeri ]**

## 19. PR-1523-U(27)292

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat menggesa Kerajaan mengambil tindakan yang lebih pro-aktif dan efisien bagi meningkatkan kesedaran, tindak balas, dan kerjasama masyarakat dalam menghadapi bencana alam. Kerajaan telah mengumumkan penubuhan Pusat Bencana Geologi Negara pada akhir tahun ini serta pembangunan Sistem Amaran Awal Tanah Runtuh (SAATR). Inisiatif ini akan dapat meningkatkan kecekapan tindak balas bencana agensi-agensi berkaitan. Bagaimana pula dengan tindak balas masyarakat.

Apa yang telah dan sedang Kerajaan usahakan bagi memastikan rakyat bukan sahaja peka tetapi takut dan patuh kepada arahan yang dikeluarkan oleh pihak berkuasa. Kerajaan perlu menguatkuasakan Akta Pertahanan Awam 1951, Akta 221 bawah seksyen 4 (C) di mana tindakan boleh diambil ke atas mereka yang tidak patuh kepada arahan pihak berkuasa contohnya arahan untuk berpindah dalam situasi banjir yang boleh membahayakan penduduk dan pada masa yang sama memberi risiko kepada penyelamat."

**[ Perdana Menteri ]**

## 20. PR-1523-U(27)293

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa supaya Kerajaan menubuhkan badan siasatan bebas bagi mengenal pasti secara terperinci punca utama yang menyebabkan kekurangan bekalan makanan seperti beras tempatan, ayam dan telur ayam di pasaran serta merangka perancangan penyelesaian jangka pendek dan panjang yang komprehensif termasuk penguatkuasaan terhadap golongan kartel orang tengah serta menambahkan daya pengeluaran bekalan makanan. Rakyat baik dari kalangan pengguna mahupun pengusaha restoran kecil masih mengeluh dengan permasalahan ini yang menyebabkan kenaikan harga bekalan makanan. Kerajaan tidak seharusnya melepaskan tanggungjawab menjaga keterjaminan bekalan makanan kepada individu (sebagai *end user*) mahupun menyarankan penyelesaian jalan mudah seperti menambah import makanan tetapi mencari penyelesaian sepanjang rangkaian jaringan bekalan bahan makanan mentah."

**[ Menteri Pertanian dan Keterjaminan Makanan ]**

21. PR-1523-U(27)294

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya mewujudkan pusat benih padi khusus di kawasan utara khususnya di Arau, Perlis bagi membekalkan benih-benih padi yang bermutu tinggi dan membolehkan penyelidikan yang agresif dibuat bagi menghasilkan benih padi baru di samping menyelesaikan masalah ketidakcukupan benih padi di pasaran. Pusat Benih Padi adalah penting untuk mengumpul benih padi yang lebih berdaya komersial, lebih berdaya tahan iklim (*climate resistant*) dan sesuai dengan cuaca di kawasan utara Semenanjung Malaysia. Pusat ini juga boleh berperanan menjalankan kajian di peringkat serantau dan melibatkan penyelidik daripada negara-negara jiran seperti Thailand, Indonesia dan Myanmar yang mempunyai tanaman baka padi yang berdaya komersial tinggi."

**[ Menteri Pertanian dan Keterjaminan Makanan ]**

22. PR-1523-U(27)295

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya mengkaji semula peruntukan khas yang boleh diberikan kepada pekebun kecil, penternak dan nelayan yang terjejas akibat situasi iklim yang tidak menentu serta kenaikan harga barang. Kerosakan tanaman dan kematian ternakan seringkali mendatangkan kerugian besar hingga kepada jutaan ringgit setiap kali berlaku bencana alam. Dengan situasi semasa ekonomi negara yang tidak stabil juga secara tidak langsung akan memberi tekanan kepada kos sara hidup pekebun kecil, penternak dan nelayan yang kebanyakannya bergantung harap kepada sumber pendapatan tersebut sahaja. Maka pemberian peruntukan khas ini dapat menambah baik kehidupan mereka."

**[ Menteri Pertanian dan Keterjaminan Makanan ]**

23. PR-1523-U(27)296

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya menyegerakan pembinaan dan baik pulih tembok sempadan Malaysia-Thailand supaya merangkumi keseluruhan perbatasan dari Perlis hingga Kelantan dan menyediakan suatu pelan tindakan komprehensif merangkumi semua agensi Kerajaan bagi kawalan sempadan Malaysia-Thailand. Sempadan Malaysia-Thailand adalah sepanjang kira-kira 656km namun hanya 111 km sahaja yang berpagar. Sebahagian tembok sempadan antara Malaysia dan Thailand di sepanjang Laluan Keselamatan dan Pembangunan (KESBAN) dilihat sudah usang manakala peralatan kamera litar tertutup (CCTV) dan alat pengimbas

perlu ditambah, dibaik pulih dan dinaik taraf dengan teknologi terkini seperti penggunaan dron. Beberapa insiden pada masa lalu seperti kes tembakan ke atas pasukan keselamatan negara dan bermaharajalelanya sindiket pemerdagangan manusia seperti yang berlaku di insiden Wang Kelian serta penyeludupan barangan termasuk dadah dan senjata menunjukkan betapa kritikalnya keperluan untuk meningkatkan tahap keselamatan di perbatasan. Kerajaan Malaysia sebelum ini telah memberikan komitmen untuk membina tembok sempadan tersebut tetapi sehingga terkini masih tiada pelan pembangunan komprehensif dan terperinci yang diumumkan. Mohon pihak kerajaan memandang serius perkara ini dengan menyegerakan pembangunan tembok sempadan Malaysia-Thailand secara menyeluruh dan memastikan suatu pelan komprehensif merangkumi semua agensi Kerajaan bagi kawalan sempadan Malaysia-Thailand agar benar-benar berkesan menjamin keselamatan perbatasan negara."

**[ Perdana Menteri ]**

24. PR-1523-U(27)297

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya agihan peruntukan pembangunan dan pelaksanaan projek pembangunan di peringkat negeri diberikan mengikut keutamaan dan keperluan Kerajaan Negeri. Berdasarkan pelan RMK-12, enam negeri kurang membangun akan terus diberi keutamaan dengan agihan sekurang-kurangnya 50% daripada keseluruhan peruntukan Perbelanjaan Pembangunan Asas Persekutuan. Namun begitu, terdapat beberapa projek yang diluluskan oleh Kerajaan Persekutuan tidak mengambil kira cadangan dan hasrat Kerajaan Negeri khususnya di Perlis untuk mempelbagaikan fungsi sesuatu projek sedangkan Kerajaan Negeri mempunyai dasar serta hala tuju yang telah mengambil kira pelbagai keperluan dan kehendak semasa serta pada masa hadapan. Misalnya, Projek Lencongan Banjir Barat Timah Tasoh yang telah dilaksanakan pada tahun 2015, di mana dalam pembinaan terowong banjir terdapat skop pembinaan pada item pencahayaan di dalam terowong berjumlah RM300 ribu. Namun, skop berkenaan telah dikeluarkan atas alasan penjimatan. JPS Perlis selaku pelaksana projek telah membangkitkan perkara ini supaya dikekalkan atas faktor keselamatan dan memudahkan kerja pemantauan serta penyelenggaraan di dalam terowong di masa hadapan. Akan tetapi, ianya masih tetap dikeluarkan daripada skop asal projek."

**[ Menteri Ekonomi ]**

25. PR-1523-U(27)298

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Kerajaan tidak boleh hanya memperkenalkan inisiatif yang hanya sekadar '*rebranding*' daripada Kerajaan sebelum ini kerana perubahan yang besar perlu dilakukan bagi mendepani kenaikan kos pembinaan disebabkan kenaikan harga barang binaan. Dasar Perumahan Negara (2018-2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan Negara dan memerlukan input dari pelbagai Agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini juga akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40."

**[ Perdana Menteri ]**

26. PR-1523-U(27)299

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan melaksanakan segera projek-projek tebatan banjir di seluruh negara untuk memastikan projek ini dilaksanakan secara holistik dan dapat mencari jalan penyelesaian kepada isu banjir yang semakin meruncing akibat kesan perubahan iklim dan pembangunan yang tidak mesra alam. Antara projek yang perlu dilaksanakan segera adalah seperti Projek Pembangunan Sungai Bersepadu (PLSB) Sungai Golok (KESBAN) dan Sungai Kelantan. Dengan pembinaan projek tersebut, risiko banjir besar dapat dikurangkan. Di samping itu, projek tebatan banjir di Selangor khususnya di Shah Alam dan bandar Kuala Lumpur juga diharapkan dapat dilaksanakan dengan komprehensif agar dapat menangani masalah banjir kilat."

**[ Menteri Sumber Asli, Alam Sekitar dan Perubahan Iklim ]**

27. PR-1523-U(27)300

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa supaya Kerajaan melaksanakan satu perancangan persediaan dan pengurusan risiko bagi menghadapi bencana alam dapat disemak semula akibat impak perubahan iklim yang sangat drastik sejak kebelakangan ini. Hal ini demikian kerana perancangan rapi penting bagi memastikan tahap kesiapsiagaan anggota terlibat berada di tahap yang tinggi. Di samping itu, Kerajaan juga perlu merencana satu langkah holistik bagi mendidik masyarakat agar bersiap siaga untuk menghadapi bencana alam kerana kesedaran terhadap isu ini di dalam kalangan masyarakat masih berada di tahap yang rendah berdasarkan peristiwa bencana alam yang lepas."

**[ Perdana Menteri ]**

28. PR-1523-U(27)301

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya membentuk satu pasukan petugas khas bagi memberi perhatian terhadap isu pencerobohan sempadan yang berlaku di Sabah dan Sarawak. Seperti di ketahui, Sabah dan Sarawak pula berkongsi sempadan darat sejauh 2,019.5km dengan Kalimantan, Indonesia. Daratan Negara Brunei Darussalam dibatasi sepenuhnya oleh Sarawak sepanjang 481.3km. Kebanyakan kawasan perbatasan Malaysia bersama negara-negara jirannya terletak di kawasan perbukitan yang diliputi hutan tebal dan kawasan perairan laut menyebabkan kawalan terhadap kawasan-kawasan ini sulit dilakukan. Oleh sebab itu, masalah pencerobohan, penyeludupan, pemerdagangan manusia dan perdagangan narkotik adalah antara isu yang saban tahun masih berlaku dan sukar ditumpaskan. Dengan siapnya Lebuhraya Sematan – Telok Melano juga baru-baru ini secara tidaklangsungnya meningkatkan risiko pencerobohan sempadan sama ada melalui darat dan laut terutamanya melalui Taman Negara Tanjong Datu. Oleh hal yang demikian, tindakan segera Kerajaan bagi mencari solusi terbaik kepada masalah kawalan sempadan ini adalah amat diharapkan."

**[ Menteri Dalam Negeri ]**

29. PR-1523-U(27)302

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya melaksanakan tindakan kawalan yang lebih ketat berkenaan jualan arak. Garis panduan yang khusus perlu dikaji dan diwujudkan oleh Kerajaan bagi mengawal penjualan arak yang meliputi waktu dan tempat jualan arak yang seragam dan boleh diguna pakai di seluruh negara bagi tujuan mengelakkan masalah sosial yang sering timbul seperti masalah rumah tangga dan kemalangan jalan raya. Oleh yang demikian, keseragaman tindakan daripada Kementerian Kewangan dan Pihak Berkuasa Tempatan (PBT) adalah amat diperlukan sekiranya ingin melaksanakan tindakan kawalan yang lebih ketat terhadap jualan arak kerana ketika ini ketidakseragaman tindakan antara dua entiti ini menjadi antara punca kawalan jualan arak tidak dapat dilaksanakan secara efektif dan efisien."

**[ Menteri Kewangan ]**

30. PR-1523-U(27)303

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan bersikap adil dalam mengamalkan kebebasan media di Malaysia. Kerajaan tidak seharusnya menjadikan Suruhanjaya Komunikasi Multimedia Malaysia (SKMM) sebagai alat politik untuk menyekat mana-mana isi kandungan media yang tidak '*pro*' Kerajaan atau tidak sependapat dengan Kerajaan. YAB Perdana Menteri yang memerintah Kerajaan pada masa ini telah berikrar dalam manifestonya untuk memastikan hak kebebasan bersuara dan melindungi kebebasan media. Namun, keadaan sebaliknya berlaku selepas beberapa bulan beliau membentuk Kerajaan. Lebih mendukacitakan, kebebasan media yang diwar-warkan Kerajaan hanyalah terhad kepada '*pro*' Kerajaan sahaja, manakala parti pembangkang secara halus dikenakan sekatan kepada akses media. Mana-mana media rasmi Kerajaan mahupun swasta tidak diberi kebenaran untuk menyiarkan berita mengenai parti pembangkang mahupun pihak yang menentang Kerajaan. Oleh demikian, Kerajaan digesa supaya berlaku adil dalam menyalurkan maklumat kepada rakyat. Tindakan ini adalah penting untuk memastikan hak kebebasan media tidak dicabul sewenang-wenangnya oleh pihak-pihak tertentu."

**[ Menteri Komunikasi dan Digital ]**



31. PR-1523-U(27)304

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya menyediakan perancangan, peruntukan dan prasarana kepada pelajar-pelajar universiti, kolej, STPM dan SPM bagi menghadapi kaedah pembelajaran alaf baru seperti pembelajaran dalam talian dan menggunakan media elektronik. Ini bagi membolehkan dan mendedahkan mereka ke alam teknologi siber dan e-pembelajaran yang semakin berkembang yang seterusnya memerlukan guru-guru yang terlatih dalam pendidikan alaf baru."

**[ Menteri Pendidikan ]**

32. PR-1523-U(27)305

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan mengkaji semula kawasan keluar dan masuk sempadan Malaysia-Thailand di Wang Kelian, Perlis. Sebelum ini, penduduk kedua-dua negara boleh menikmati kemudahan bergerak sehingga dua kilometer tanpa menggunakan pasport atau pas sempadan pada hari minggu. Kuatkuasa itu pernah dibuat bermula tahun 1993 hingga 2015. Akan tetapi, penarikan semula kemudahan kebebasan bergerak ini telah dibuat pada tahun 2015 kerana penemuan rangka manusia mangsa sindiket pemerdagangan manusia yang dipercayai etnik Rohingya. Susulan itu, Wang Kelian menjadi pekan mati hingga kini. Kerajaan Negeri Perlis cuba membangunkan semula kawasan pelancongan di Wang Kelian, namun ianya tidak semeriah dahulu. Justeru itu, Kerajaan diharapkan dapat mengkaji dan mempertimbangkan semula untuk memberi kemudahan bergerak di antara kedua-dua negara seperti sebelum ini. Dengan kemudahan tersebut, ianya akan dapat menjana semula perkembangan ekonomi khususnya buat penduduk tempatan yang sebelum ini amat rancak sebelum ditutup sepenuhnya pada tahun 2015. Semasa adanya '*Free Flow*' ini, Wang Kelian merupakan satu destinasi pelancongan yang amat meriah dan telah memberi ruang kepada peniaga-peniaga kecil di Perlis dan juga Selatan Thailand menambahkan pendapatan mereka."

**[ Menteri Dalam Negeri ]**

**RISALAT-RISALAT YANG DIBAWA KE DALAM MESYUARAT  
(DEWAN RAKYAT)**

| <b><u>TAHUN</u></b><br><b><u>2023</u></b> | <b><u>RISALAT/DOKUMEN</u></b>                                                                                                                                                                                                        | <b><u>TARIKH</u></b><br><b><u>DIBENTANGKAN</u></b> |
|-------------------------------------------|--------------------------------------------------------------------------------------------------------------------------------------------------------------------------------------------------------------------------------------|----------------------------------------------------|
| DR. 7                                     | Laporan Jawatankuasa Kira-Kira Wang Negara (PAC) Parlimen Berhubung Terimaan dan Bayaran Obligasi Sosial Perjanjian Konsesi Pengurusan Industri Padi Dan Beras Negara Di Bawah Kementerian Pertanian Dan Keterjaminan Makanan (KPKM) | 11 Oktober 2023                                    |
| DR. 10                                    | Penyata Jawatankuasa Pemilih Dewan Rakyat Yang Kelima Belas Menurut Peraturan Mesyuarat 76 (2) Peraturan-Peraturan Majlis Mesyuarat Dewan Rakyat                                                                                     | 11 Oktober 2023                                    |
| ST. 117                                   | Laporan Tahunan dan Penyata Kewangan Institut Penyelidikan dan Kemajuan Pertanian Malaysia (MARDI) Bagi Tahun 2021                                                                                                                   | 11 Oktober 2023                                    |
| ST. 119                                   | Laporan Tahunan dan Penyata Kewangan Lembaga Kemajuan Pertanian Muda (MADA) Bagi Tahun 2021                                                                                                                                          | 11 Oktober 2023                                    |
| ST. 151                                   | Laporan Tahunan dan Penyata Kewangan Perbadanan Pengurusan Sisa Pepejal dan Pembersihan Awam (SWCorp) Bagi Tahun 2021                                                                                                                | 11 Oktober 2023                                    |
| ST. 152                                   | Laporan Tahunan dan Penyata Kewangan Lembaga (Penyelidikan dan Kemajuan) Perusahaan Timah Bagi Tahun 2021                                                                                                                            | 11 Oktober 2023                                    |
| ST. 153                                   | Laporan Tahunan dan Penyata Kewangan Pertubuhan Keselamatan Sosial (PERKESO) Bagi Tahun 2021                                                                                                                                         | 11 Oktober 2023                                    |
| ST. 154                                   | Laporan Tahunan dan Penyata Kewangan Perbadanan Aset Keretapi Bagi Tahun 2021                                                                                                                                                        | 11 Oktober 2023                                    |

**\*\*UCAPAN-UCAPAN**  
**( PERATURAN MESYUARAT 17 )**  
**( KAMAR KHAS )**

| <b>Tarikh Ucapan</b>    | <b>Ahli Yang Berucap</b>                    | <b>Tajuk Ucapan</b>                                                        | <b>Menteri Yang Bertanggungjawab</b>                        |
|-------------------------|---------------------------------------------|----------------------------------------------------------------------------|-------------------------------------------------------------|
| 1. 11.10.2023<br>(Rabu) | 1. YB Puan Vivian Wong Shir Yee (Sandakan)  | 1. Permohonan Kewarganegaraan di bawah Perkara 15 Perlembagaan Persekutuan | 1. YB Menteri Dalam Negeri                                  |
| 2. 11.10.2023<br>(Rabu) | 2. YB Puan Vivian Wong Shir Yee (Sandakan)  | 2. Isu Berat Dengan Muatan (BDM) Kenderaan di Sabah                        | 2. YB Menteri Kerja Raya                                    |
| 3. 11.10.2023<br>(Rabu) | 3. YB Tuan Wan Razali bin Wan Nor (Kuantan) | 3. Isu berkaitan Projek Pembetungan Kuantan                                | 3. YB Menteri Sumber Asli, Alam Sekitar dan Perubahan Iklim |
| 4. 11.10.2023<br>(Rabu) | 4. YB Tuan Wan Razali bin Wan Nor (Kuantan) | 4. Pemasangan Paip Bekalan Air Luar Bandar                                 | 4. YB Menteri Kemajuan Desa dan Wilayah                     |

**\*\* Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17)**